

無爲文選

冠絕古今震寰宇

August 25, 2024

Contents

1	清	5
1.1	菊花詩十二首/曹雪芹	5
1.2	螃蟹詠三首/曹雪芹	7

Chapter 1

清

1.1 菊花詩十二首/曹雪芹

〈憶菊〉 蘅蕪君

悵望西風抱悶思，蓼紅葦白斷腸時。空籬舊圃秋無跡，冷月清霜夢有知。
念念心隨歸雁遠，寥寥坐聽晚砧遲。誰憐我爲黃花瘦？慰語重陽會有期。

〈訪菊〉 怡紅公子

閑趁霜晴試一遊，酒杯藥盞莫淹留。霜前月下誰家種？檻外籬邊何處秋？
蠟屐遠來情得得，冷吟不盡興悠悠。黃花若解憐詩客，休負今朝掛杖頭。

〈種菊〉 怡紅公子

攜鋤秋圃自移來，籬畔庭前處處栽。昨夜不期經雨活，今朝猶喜帶霜開。
冷吟秋色詩千首，醉酌寒香酒一杯。泉溉泥封勤護惜，好和井徑絕塵埃。

〈對菊〉 枕霞舊友

別圃移來貴比金，一叢淺淡一叢深。蕭疏籬畔科頭坐，清冷香中抱膝吟。
數去更無君傲世，看來惟有我知音。秋光荏苒休辜負，相對原宜惜寸陰。

〈供菊〉 枕霞舊友

彈琴酌酒喜堪儔，几案婷婷點綴幽。隔坐香分三徑露，拋書人對一枝秋。

霜清紙帳來新夢，圓冷斜陽憶舊遊。傲世也因同氣味，春風桃李未淹留。

〈詠菊〉瀟湘妃子

無賴詩魔昏曉侵，繞籬欹石自沉音。毫端蘊秀臨霜寫，口角噙香對月吟。
滿紙自憐題素怨，片言誰解訴秋心？一從陶令評章後，千古高風說到今。

〈畫菊〉蘅蕪君

詩餘戲筆不知狂，豈是丹青費較量？聚葉潑成千點墨，攢花染出幾痕霜。
淡濃神會風前影，跳脫秋生腕底香。莫認東籬閒採掇，粘屏聊以慰重陽。

〈問菊〉瀟湘妃子

欲訊秋情眾莫知，喃喃負手叩東籬：孤標傲世偕誰隱？一樣開花爲底遲？
圃露庭霜何寂寞？雁歸蛩病可相思？莫言舉世無談者，解語何妨話片時？

〈簪菊〉蕉下客

瓶供籬栽日日忙，折來休認鏡中粧。長安公子因花癖，彭澤先生是酒狂。
短鬢冷沾三徑露，葛巾香染九秋霜。高情不入時人眼，拍手憑他笑路旁。

〈菊影〉枕霞舊友

秋光疊疊復重重，潛度偷移三徑中。窗隔疏燈描遠近，籬篩破月鎖玲瓏。
寒芳留照魂應駐，霜印傳神夢也空。珍重暗香休踏碎，憑誰醉眼認朦朧？

〈菊夢〉瀟湘妃子

籬畔秋酣一覺清，和雲伴月不分明。登仙非慕莊生蝶，憶舊還尋陶令盟。
睡去依依隨雁斷，驚迴故故惱蛩鳴。醒時幽怨同誰訴？衰草寒煙無限情！

〈殘菊〉蕉下客

露凝霜重漸傾欹，宴賞纔過小雪時。蒂有餘香金淡泊，枝無全葉翠離披。
半床落月蛩聲切，萬裡寒雲雁陣遲。明歲秋分知再會，暫時分手莫相思！

1.2 螃蟹詠三首/曹雪芹

〈其一〉 怡紅公子

持螯更喜桂陰涼，潑醋搗薑興欲狂。饕餮王孫應有酒，橫行公子竟無腸！
臍間積冷饒忘記，指上沾腥洗尚香。原爲世人美口腹，坡仙曾笑一生忙。

〈其二〉 瀟湘妃子

鐵甲長戈死未忘，堆盤色相喜先嘗。螯封嫩玉雙雙滿，殼凸紅脂塊塊香。
多肉更憐卿八足，助情誰勸我千觴？對茲佳品酬佳節，桂拂清風菊帶霜。

〈其三〉 蘅蕪君

桂靄桐陰坐舉觴，長安涎口盼重陽。眼前道路無經緯，皮裡春秋空黑黃。
酒未滌腥還用菊，性防積冷定須薑。於今落釜成何益？月浦空餘禾黍香。